



PAIPAI ANA I NĀ 'OIHANA AUPUNI O KE KALANA, KA  
MOKU'ĀINA, A ME KA PEKELALA E 'AE I KA 'OIHANA 'AHA  
MOKU MA KA HO'okele 'ANA I NĀ KUMUWAIWAI 'ĀINA O  
HAWAI'I

'OIAI, ua mālama 'ia ka 'aha 'o Ho'olei 'Ia Pae'āina Pūwalu ma ka  
Hawai'i Convention Center ma Honolulu ma ka lā 19 a me ka 20 o  
Nowemapa 2010, me ke komo pū o 200 ā 'oi po'e Hawai'i 'ōiwi, he po'e  
mālama i nā hana o kahiko, he po'e lawai'a, mahi 'ai, hānai pipi,  
ho'ona'auao, 'elele o nā aupuni kūlanakauhale, 'elele o ke aupuni  
moku'āina, a me ka lehulehu, a

'OIAI, ua 'aelike 'ia he 'oihana ku'una a hana pono ka 'oihana 'Aha Moku i kūkulu 'ia ma luna  
o ke kaiāulu no ka ho'okele 'ana i nā kumuwaiwai 'āina o Hawai'i, a

'OIAI, ua 'aelike nā 'aha kūkā o kēlā me kēia mokupuni ma ka 'aha pūwalu he pono ka 'Aha  
'Ōlelo o ke aupuni moku'āina 'o Hawai'i e ho'onui hou a'e, ho'ololi a ho'okō i ke Kānāwai 212:

- E ho'omau 'ia ka 'oihana 'Aha Moku;
- E ho'okō 'ia nā 'ōlelo koi a ko kēlā me kēia mokupuni ma ka 'Aha Kiole o ka 2009 i ka  
'Aha 'Ōlelo;
- E wae/koho pāloka 'ia nā 'elele hou o ka 'Aha Kiole e nā 'aha kūkā o ka 'Aha Moku i  
ho'okumu 'ia ma kēlā me kēia mokupuni;
- Ma kahi i kūkulu 'ole 'ia ai nā 'aha kūkā o ka 'Aha Moku, he pono e kūkulu 'ia me ka  
'āwīwī i hiki;
- E ho'omau 'ia ka ho'oholo 'ia 'ana o nā mea e pono ai 'o Ni'ihau a Kahelelani ma lalo o  
kona 'oihana konohiki pono'i;
- E 'ae maoli 'ia kēia mau 'aha kūkā o ka 'Aha Moku;
- E ho'ololi 'ia ka hana o ka 'Aha Kiole i mea e lilo ai ia 'o ia ke ala ma waena o ka  
'oihana 'Aha Moku a me ka 'Aha 'Ōlelo o ka Moku'āina 'o Hawai'i; a
- E hō'ike ka 'Aha Kiole i ka 'Aha 'Ōlelo no ke kūlana o ka 'oihana 'Aha Moku mai 'ō a  
'ō o ka pae'āina ma ka pau 'ana o ka 2011, a

'OIAI ua kāko'o pū nā lālā o ka 'aha pūwalu i nā hana ku'una a nā kūpuna i ola ai ka lāhui  
Hawai'i 'ōiwi a me ko lākou nohona, 'o ka lawai'a pū i nā i'a like 'ole o ke kai, 'o ka honu pū nō  
ho'i i mea'ai mai kēlā pae ā kēia pae o ka pae'āina 'o Hawai'i;

'ĀNŌ, E HO'OHOLO 'IA he paipai nā lālā o ka 'Aha Pūwalu o ka Moku'āina 'o Hawai'i i nā  
'oihana o nā aupuni kalana, moku'āina, a me ka pekelala, ma kekahi 'aha hālāwai ma ka Hawai'i  
Convention Center ma ka lā 19 a me ka 20 o Nowemapa 2010, e 'ae 'oko'a i ka 'oihana 'Aha  
Moku he māhele ia o ka 'oihana ho'okele kumuwaiwai 'āina o Hawai'i me ka 'ae pū i nā hana  
ku'una; a

E HO'OHOLO PŪ 'IA e ho'olele 'ia nā kope o kēia 'Ōlelo Ho'oholo ma ka 'ōlelo Hawai'i a me ka  
'ōlelo Pelekānia i ka meia o kēlā me kēia kalana, ke Kia'āina o Hawai'i, ka Pelekikena o ka 'Aha  
Kenekoa, ka Waha'ōlelo o ka Hale, ke Po'o o ke Kōmike Kenekoa no ka 'Oihana Ho'okolokolo a  
me nā Kumuhana Hawai'i, ke Po'o o ka Papa Kahu Waiwai o ke Ke'ena Kuleana Hawai'i, ke  
Kuhina o ka 'Oihana Kālepa, ke Po'o o ka 'Aha Ho'okele o ka 'Āpana o ka Pākīpika Komohana, a  
me ke Kuhina 'Amelika i Nā Aupuni Hui 'ia.